



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.169/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Skender Çoçaj kryesues, Kymete Kicaj dhe Arsim Hamzaj anëtarë, duke vendosur përkitazi me ankesën e Subjektit Politik Lëvizja Vetëvendosje (LVV), me seli në Prishtinë, parashtruar kundër Subjektit Politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 26.01.2025, merr këtë :

V E N D I M

REFUZOHET e pabazuar ankesa Anr.169/2025 e datës 24.01.2025, e parashtruar nga Subjekti Politik Lëvizja Vetëvendosje (LVV), me seli në Prishtinë, parashtruar kundër Subjektit Politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025.

A r s y e t i m

Me datë 24.01.2025 PZAP-i, ka pranuar një ankesë nga subjekti politik Lëvizja Vetëvendosje (LVV), me seli në Prishtinë me të cilën pretendon se më 24 janar 2025, Qendra e Lëvizjes Vetëvendosje, në Prishtinë ka identifikuar banerët/posterët të vendosur në rrugën hapësirat/objektet/ rrugët publike të kandidatës për deputete nga radhët e LDK-së Doruntinë Maloku, në rrugën “Eqrem Qabej” në pjesën “Hyrja Fakulteti”, konkretisht në hapësirat/muret e “Parking Prishtina - 038 Parking Center” në Prishtinë.

Më tutje parashtruesi i ankesës thekson se me këtë veprim kandidatja dhe subjekti politik LDK kanë bërë shkelje të nenit 34, paragrafi 1 nën paragrafi 1.2 të Ligjit Nr.08/L-228 për Zgjedhjet e Përgjithshme në Republikën e Kosovës-LZP, nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se “Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave

publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose ne hapësirat private pa lejen e pronareve ose shfrytëzuesve.” Tutje parashtruesi i ankesës thekson se përmes këtij veprimi, subjekti përkatës, ka cenuar rëndë dispozitat përkatëse ligjore dhe duke u mbështetur në bazën ligjore dhe argumentet e lartcekura, gjithashtu bazuar tashmë në praktikën e PZAP-së, mes tjerash me vendimet Anr.48/2025, Anr.49/2025, Anr.50/2025, Anr.51/2025, ka kërkuar që masa e sanksionit të vendoset në përputhje me legjislacionin në fuqi.

Si provë parashtruesi i ankesës ka bashkangjitur një fotografi që dëshmon vendosjen e banerit/posterit në kundërshtim me LZP.

Më datë 24.01.2025, PZAP-i, e njoftoi subjektin politik Lidhja Demokratike e Kosovës (LDK), me seli në Prishtinë, për ankesën e paraqitur kundër tyre, duke i dërguar kërkesë për përgjigje deri me 25.01.2025 në ora 09:00.

Në përgjigje në ankesë të paraqitur me datë 25.01.2025, subjekti politik Lidhja Demokratike e Kosovës (LDK), ka kundërshtuar ankesën e parashtruar nga subjekti politik Lëvizja Vetëvendosje, me pretendimin se për subjektin politik Lidhja Demokratike e Kosovës ekziston Pëlqim i Parking Center Publike në Prishtinë, ku miratohet kërkesa për shfrytëzim të hapësirës reklamuese nga ana e znj. Doruntinë Maloku, në afat të caktuar kohor, respektivisht i lejohet vendosja e reklamave. Raste precedentë ku PZAP ka refuzuar ankesat e njëjta të subjektit politik LVV keni vendimet Anr.93/2025 dhe 95/2025. Tutje përmes përgjigjes në ankesë subjekti politik LDK ka kërkuar nga PZAP që të marr vendim meritator për rastin në fjalë dhe duke u bazuar në krejt ato që u thanë dhe provat e bashkangjitura ka kërkuar që ankesa e subjektit politik LVV të refuzohet si e pabazuar.

Si provë në përgjigje në ankesë ka bashkangjitur Pëlqimin e lëshuar nga Parking Centër në Prishtinë, ku miratohet kërkesa për shfrytëzim të hapësirës publike, respektivisht i lejohet vendosja e reklamave në muret e 038 Parking Center në Prishtinë.

Paneli pasi që shqyrtoj ankesën vlerësoi se :

Ankesa është e pabazuar.

PZAP-i, pasi që shqyrtoj dhe vlerësoi ankesën gjeti se ankesa është e pa bazuar.

- Paneli pas shikimit të shkresave të lëndës dhe përgjigjes në ankesë të paraqitur nga Subjekti Politik LDK, vlerësoj se pretendimet e Subjektit Politik LVV, janë të pa qëndrueshme dhe si të tilla i refuzoj për faktin se veprimet e përshkruara në ankesë nuk paraqesin shkelje të dispozitës së nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat*

ndërkombëtare ose brenda ose ne hapësirat private pa lejen e pronareve ose shfrytëzuesve.”

Kjo për faktin se parashtruesi i ankesës i referohet shkeljes së dispozitës ligjore të lartcekur, mirëpo paneli në bazë të shkresave të bashkangjitura në përgjigje në ankesë në këtë rast, fotot e bashkangjitura, pëlqimin nga shfrytëzuesi i hapësirës 038 Parking Center si dhe kontrata e shfrytëzuesit të lidhur me komunën e Prishtinës, vërtetoi se vendosja e posterit nga kandidatja për deputet nga radhët e Subjekti Politik LDK, Doruntinë Maloku është në pajtim me nenin 5 të Rregullores Zgjedhore Nr.07/2024, neni 5 Të drejtat dhe obligimet e subjekteve politike gjatë mbajtjes së tubimeve publike konkretisht nën paragrafi 1.2 *“të publikojnë dhe të shpërndajnë afishe përmes shtandeve apo në hapësira publike, reklama dhe material tjetër lidhur me një fushatë zgjedhore”*.

Andaj duke u mbështetur në nenin 117.3 të LZP-së ku përcaktohet se *“vendosja për ankesat nga PZAP-ja, mbështetet në dëshmi të qarta dhe bindëse”*, Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se nga veprimet e përshkruara në ankesë nga parashtruesi i ankesës nuk paraqesin shkelje të dispozitave të lartcekura, dhe të njëjtën e refuzoi si të pabazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 të LZP-së, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

Anr.169/2025 datë 26.01.2025

Kryesues i Panelit,
Skender Çoçaj



KËSHILLA JURIDIKE: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.